

Aalisarneq pillugu Inatsisartut inatsisaat

Kapitali 1

Siunertat, atuuffia, nassuaatit aamma oqartussaasut pillugit aalajangersakkat

Siunertaq

§ 1. Kalaallit Nunaanni aalisakkanit isumalluutit kalaallit inuiqatigiit ataatsimut pigaat. Inatsisartut inatsisaata matuma siunertaraa inuiqatigiit siunissami aalisarnermiit sappingisamik annerpaamik iluanaaruteqarnissaasa qulakkeerneqarnissaa peqatigisaanillu aalisarnermiit inuussutissarsiummi tunngaviusunik piumasaqaatit ataqtigiiissut patajaatsullu pilersinneqarlutik.

Imm. 2. Inatsimmik matuminnga aqtsinermi aalisarnermi isumalluutit nungusaataanngitsumik iluaqtigineqarneri aamma aalisagaqatigiit nungusaataanngitsumik siunissami ungasinnerusumi annerpaamik pissarsiffiusinnaallutik qaffasisssuseqarnerisa allangortinnginnissaat pingartinneqassaaq.

Imm 3. Inatsisartut inatsisaannik matuminnga aqtsinermi aamma pingaartinneqassapput:

- 1) aalisarnermi piginnaasat aamma aalisarnermi periarfissat akornanni oqimaaqatigiittooqassasoq, piginnaasallu sunniuteqarluartumik iluaqtigineqassasut;
- 2) inuussutissarsiutip inuiqatigiilli ineriertortinnissaanut ineriertorteqqinnissaannullu iluaqutaasumik aningaasaliinissap kajuminartuunissaa,
- 3) ilisimatuussutsikkut siunnersuineq,
- 4) najugaq pillugu ilaqtariinnermullu tunngasunik isiginninneq
- 5) illugiilluni nunanilu tamalaani isumaqatigiissutit nunallu tamalaat akornanni isumaqatigiissutaat,
- 6) immami pinngortitami pissuseqatigiit ataqtiginnerannut aalisarnerup ajoqutaanerata minnerpaaffianiititsineq,
- 7) inuit imminut pilorsorsinnaanissamut periarfissaqartitaanissaat,
- 8) attuumassuteqartunik peqataatitsineq, aamma
- 9) aalisarnerup ammasumik pissuseqarfiusumik ingerlanneqarnera aqunneqarneralu.

Atuuffia

§ 2. Inatsit aalisakkatigut pisuussutinik iluaquteqarnermut aamma Kalaallit Nunaata aalisarnikkut oqartussaaffisaani isumalluutinik iluaquteqartunik aalisarnernik aqtsinermi, Kalaallit Nunaata aalisarnikkut oqartussaaffiata avataani kalaallit ingerlataqartut inuussutissarsiutigalugu aalisarnerannut aamma Kalaallit Nunaata aalisarnikkut oqartussaaffiata avataani kalaallinut pisassiissutinik nunat allamiut angallataasa aalisarnerannut kiisalu nunat marluk imaluunniit nunat tamalaat isumaqatigiissutaat naapertorlugu Kalaallit Nunaat inatsisikkut imaluunniit nakkutiliinikkut oqartussaaffiani atorneqarpoq.

Nassuaatit

§ 3. Inatsisartut inatsisaanni uku ima paasineqassapput:

- 1) "Aalisarneq", aalisakkanik sumiissusersiuineq, aalisarnermi atortunik ningitsineq, kalinneq amuarnerlu, pisanik angallammut qaqitsineq, nuussineq, aalisakkanik ungalusanut inissiineq, aamma aalisakkanik aalisakkanillu tunisassianik tulaassineq. Tassunga atatillugu qaleruallit qalerualinnillu tunisassiat aalisakkamut naligitinneqarput.
- 2) "Inuussutissarsiutigalugu aalisarneq" pisat tamarmiusut taakkualuunniit ilaasa tunineqarnissaat siunertaralugu aalisarneq.
- 3) "Inuussutissarsiutiginagu aalisarneq" pisat tamarmiusut nammineq atornissaat siunertaralugu aalisarneq.
- 4) "Sinerissap qanittuani aalisarneq", sineriammit avammut 3 səmili angullugu, tunngaviusumik killeqarfiup iluani aalisarneq.
- 5) "Avataasiorluni aalisarneq": aalisarneq, sinerissap qanittuani aalisarfiusup avataani aalisarneq.
- 6) "Assigiimmik inuussutissarsiutillit", inuussutissarsiutitut pingarnertut inuussutissarsiutigalugu aalisarnermk, inuussutissarsiutigalugu aalisarnermk imaluunniit inuussutissarsiutiginagu aalisarnermk ingerlatsinersut naapertorlugit inuttut ataatsimoortutut erseqqinnerusumik killilerneqarsimasut.
- 7) "Pisassat amerlanerpaaffilerlugit akuerisat." TAC tassaavoq Kalaallit Nunaanni aalisakkanut aalajangersimasunut ukiumut amerlanerpaaffilerlugit akuerisaasumik pisarineqarsinnaasut.
- 8) "Pisassiissutit": pisassiissutinit amerlanerpaaffiliilluni pisassiissutit ilaannit akuerisat ilaat.
- 9) "Pisassiissutinit": pigisat Ingerlatsisup pisassiissutinit pigisai.
- 10) "Ukiumut pisassiissutit": ukumi aalajangersimasumi pisassiissutinit aalisartup amerlanerpaamik pisarisinnaasai.
- 11) "Akuersissut": sumiiffimmi aalajangersimasumi piffissamilu aalajangersimasumi aalisagaqtigiinnik aalajangersimasunik aalisarnissamut akuersissut.
- 12) "Angallat": imaani nunamiliunniit assartuut suugaluartorluunniit aalisarnermut atatillugu atorneqartoq.
- 13) "Aalisariutit ilaat immikkoortut", aalisariutit ilaat immikkoortut erseqqinnerusumik killilerneqarsimasut.
- 14) "Usinik nuussineq": pisanik tunitsivinnut tunineqanngitsunik imaluunniit taakkunanit tunisassiarineqarsimasut angallammit angallammut nuussinneq, tamanna imaani umiarsualivimmiluunniit pisinnaavoq.
- 15) "Piareersaneq Tunisassianik suliaqarneq": pisanik suliarinninneq tamaat, saliineq, niaquiaaneq sikulersuinerlu ilanngunnagut.
- 16) "Kalaallit aalisariutaat", angallatit suulluunniit Kalaallit Nunaanni angerlarsimaffeqartutut nalunaarsorneqarsimasut § 10-milu piumasaqaatinik naammassinnittut.
- 17) "Nunat allat angallataat": angallat sunaluunniit Kalaallit Nunaanni angerlarsimaffeqartutut nalunaarsorneqarsimanngitsoq.
- 18) "Tulaassineq": pisanik tunisassianilluunniit suugaluartunik taakkunannga angallammiit nunamut niusineq.

- 19) "Pisat": imaani uumasut tamarmik, soorlu miluumasut imarmiut, timmissat imarmiut, koralit pupiillu aalisarnermi isumannaarneqarsimasut.
- 20) "Kalaallit Nunaata aalisarnikkut oqartussaaffigisaa": Kalaallit Nunaata aalisarnikkut oqartussaaffigisaa (EEZ) Kalaallit Nunaata aalisarnikkut oqartussaaffigisaa aamma Kalaallit Nunaata imartatut oqartussaaffigisaa pillugu peqqussutit qaqugukkulluunniit atuuttut naapertorlugit aalajangersarneqartoq.
- 21) "Ingerlatsisoq": aalisarnermik ingerlatsisoq, inuttut ataasiakkaatut, soqtigisaqaqatigiittut, piginneqatigiilluni umiarsuaatileqatigiiffittut, ingerlatseqatigiiffittut allatigulluunniit suliffeqarfittut naalagaaffittulluunniit ilusilittut tamanna pigaluarpat apeqqutaatinneqanngitsoq.
- 22) "Tunisineq": pisanik akilersillugit niuernikkut ingerlatsineq.
- 23) "Pisanik tulaassisussaatitaaneq": pisarineqartut, Kalaallit Nunaanni nunami suliffissuarnut tunisassiatut suliarineqaqqaaratik tunineqartussat.
- 24) "Pisat tulaassisussaatitaanngitsut": pisat aalisariutinit toqqaannartumik avammut tunineqarsinnaasut imaluunniit Kalaallit Nunaanni suliffissuarnut suliarereerlugit tunineqarsinnaasut.
- 25) "Aalisagaqatigiit": uumassusileqatigiit ataasiakkaat assigiit ataatsimoortut, nunap ilaani immikkoortumi killilimmi piffissami aalajangersimasumi ataatsimoorlutik uumasuusut aamma aalisagaqatigiinnit allanit sananeqaatitigut paarlaoqatiginnissaat ilimanangitsorujussuaq.
- 26) "Aalisarneq": Nr. 1-imi nassuiarneqartumik ingerlatsineq, aalisagaqatigiinnik aalajangersimasunik imaluunniit amerlassutsinik, sumiiffimmi aalajangersimasumi imaluunniit periutsimik aalajangersimasunik tamanna ingerlanneqarpat.
- 27) "Nakkutilliinermi oqartussaq": Kalaallit Nunaanni Aalisarsinnaanermut Akuersissutinik Nakkutilliisoqarfiup aamma sakkutuut imarsiortut aalisarnermik nakkutilliisut ingerlatsisut inatsit, takuuq kapitel 14, naapertorlugu iliuuseqarnersut misissussavaat nakkutigalugillu.

Oqartussaasut pillugit aalajangersakkat

§ 4. Inatsimmi matumani aalajangersakkat suliarineqarnerat Naalakkersuisut qulakkiissavaat.

§ 5. Kalaallit Nunaanni Aalisarsinnaanermut Akuersissutinik Nakkutilliisoqarfiup aamma sakkutuut imarsiortut aalisarnermik nakkutilliisut ingerlatsisut inatsit, takuuq kapitel 14, naapertorlugu iliuuseqarnersut misissussavaat nakkutigalugillu.

Imm. 2. Naalakkersuisut nakkutilliinermik allanik oqartussanik toqqaasinjaapput, Kalaallit Nunaanni Aalisarsinnaanermut Akuersissutinik Nakkutilliisoqarfiup aamma sakkutuut imarsiortut aalisarnermik nakkutilliisut toqqarnagit.

Imm. 3. Aalajangiinermut piginnaatitaanermik inatsimmi akisussaaffit pillugit kommunalbestyrelsinut sinniisuusinjaatitaanermut tamakkiisumut ilaannakortumilluunniit malittarisassanik Naalakkersuisut aalajangersaasinnaapput.

Kapitali 2

Kalaallit Nunaata aalisarnikkut oqartussaaffigisaani aalisarsinnaaneq pillugu piumasqaatit

Kalaallit Nunaata aalisarnikkut oqartussaaffigisaani inuussutissarsiutiginagu aalisarneq

§ 6. Inuit Kalaallit Nunaanni aalajangersimasumik najugaqartut Kalaallit Nunaata aalisarnikkut oqartussaaffigisaani siumut akuersissuteqaratik inuussutissarsiutiginagu aalisarsinnaapput, taamaattoq tak. § 7.

Imm. 2. Inuit Kalaallit Nunaanni aalajangersimasumik najugaqanngitsut inuussutissarsiutiginagu aalisarsinnaassagunik akuersisummiq peqartussaapput.

Imm. 3. Naalakkersuisut imm. 2 naapertorlugu aalisarnissamut akuersisummiq tunniussisarneq pillugu aalajangersaasinnaapput, pissarsisarneq annaasaqartarnerlu pillugit malittarisassanik aalajangersaasinnaapput.

§ 7. Aalisakkanut aalajangersimasunut aalisagaqtigiinnullu inuussutissarsiutiginagu aalisarnissamut akuersissuteqartarneq pillugu malittarisassanik Naalakkersuisut aalajangersaasinnaapput.

Imm. 2. Imm. 1 naapertorlugu malittarisassanik aalajangersaanermi Inatsisartut inatsisaanni matumani, takuuq § 1, siunertat pillugit aalajangersakkat pingartinneqarput, matumani aalisakkat isumalluutigineqartut isumatusaartumik iluaqtigineqarnissaasa aamma illorsorneqarsinnaasumik aalisarneqartarnissaat pineqarpoq, aamma matumani takornariaqarnermik inuussutissarsiuteqarneq pineqarluni, taassumalu ineriertornissa.

Inuussutissarsiutigalugu aalisarnermut tunngaviusumik piumasaqaatit

§ 8. Kalaallit Nunaata aalisarnikkut oqartussaaffigisaani inuussutissarsiutigalugu aalisarnermut tunngaviuqoq akuersissut, inatsit manna naapertorlugu atulersinneqartoq, tak. kapitali 6.

Imm. 2. Akuersisummut, tak. imm. 1, tunngaviuqoq §§ 9 - 10-mi (kalaallit ingerlatsisut) imaluunniit § 13 (nunat allamiut ingerlatsisut) piumasaqaatit naammassisimanissaat, imaluunniit § 11 naapertorlugu immikkut akuersisoqarsimanagernik nalunaartoqarsimassaaq.

Kalaallit ingerlatsisut Kalaallit Nunaata aalisarnikkut oqartussaaffigisaani inuussutissarsiutigalugu aalisarnerat

§ 9. Kalaallinut ingerlatsisunut akuersissut taamaallaat pissarsiarineqarsinnaavoq pigineqarsinnaallunilu ingerlatsisunit:

- 1) imm. 2-mi piumasaqaatinik naammassinnittumit inummit,
- 2) inatsisitigut akisussaatitaasoq, imm. 3-mi piumasaqaatinik naammassinnittooq, taamaattoq inuit ataasiakkaat minillugit imaluunniit
- 3) ingerlatseqatigiiffik pisortanit pigineqartoq imaluunniit Kalaallit Nunaanni peqatigiiffik, imaluunniit ingerlatseqatigiiffik peqatigiiffilluunniit Kalaallit Nunaanni Namminersorlutik Oqartussanit ilaasortaaffigineqartoq.

Imm. 2. Ingerlatsisoq, inuttut ataasiakkaatut inissippat, inuk pineqartoq, taava taanna:

- 1) kalaallinut inuiaqtiginnut aalajangersimasumik attuumassuteqassaaq,
- 2) inuit nalunaarsorsimaffianni Kalaallit Nunaanni najugaqartut ukiunilu tallimani qaangiuttuni sivisunerusumilluunniit inuit nalunaarsorsimaffianni Kalaallit Nunaanni najugaqartutut nalunaarsimassalluni, aamma
- 3) Kalaallit Nunaannut tamakkiisumik akileraartartussaatitaassaaq aamma ukiuni tallimani qaangiuttuni, qaammatisiutit naapertorlugit, sivisunerusumilluunniit Kalaallit Nunaannut tamakkiisumik

akileraartartussaatitaasimassalluni.

Imm. 3. Ingerlatsisoq inatsisitigut akisussaasuuppat, piumasaqaatit uku naammassineqarsimassapput:

- 1) Ingerlatsisoq aktiaateqarluni ingerlatseqatigiiffiussaaq, piginneqataassuteqarluni ingerlatseqatigiiffiussaaq, piginneqatigiiffiussaaq, soqtigisaqaqatigiiffiussaaq imaluunniit piginneqatigiilluni aalisariutaatileqatigiiffiussalluni.
- 2) Inatsisitigut oqartussaasup aningaasaatai inunnit ataasiakkaanit toqqaannartumik imaluunniit toqqaannangitsumik pigineqassapput, imaluunniit ingerlatseqatigiiffinnik piginnittunit imm. 2-mi piumasaqaatinik naammassinnittunit, imaluunniit soraernerussutisiaqalernissamut aningaasaateqarfinnit pigineqassapput, piginnittuunermut taasisinnaatitaanermi assigisaanilluunniit aqqutigalugit sunniuteqarsinnaaneq assigiissinneqassaaq.

Imm. 4. Imm. 3, nr. 2-mi soraernerussutisiaqarnissamut aningaasaateqarfinnik taaneqartut Kalaallit Nunaanni najugaqartutut nalunaarsorneqarsimassapput aamma Kalaallit Nunaannut tamakkiisumik akileraartussaatitaassallutik.

Imm. 5. Akuersissummik pissarsiniaraanni ingerlatsisoq Qitiusumik Suliffeqarfiit Nalunaarsuiffianni (CVR-imik nalunaarsuiffimmi) nalunaarsorsimassaaq.

Imm. 6. Naalakkersuisut imm. 1-4-mi piumasarineqartut naammassineqarsimanersut uppersaqqusinnaavaat.

§ 10. Akuersissut ingerlatsisumut aalajangersimasumut angallammik aalajangersimasumik pigisalimmut atulersinneqassaaq, tak. § 9. Akuersissummik kisimi piginnittoq aalisariummik aalisarsinnaatitaavoq. Meterinik arfinilinnik naannerusumik akuersissuteqarluni aalisartoq, akuersissutini nammineerluni pigalugu aalisassaaq.

Imm. 2. Angallat angallatinut malittarisassat atuuttut atuutilertartullu naapertorlugit nalunaarsorneqarsimassaaq.

§ 11. Kinguaariit nikinneranni, pineqartorlu piffissani taaneqartuni ilinniagaqarneq siunertaralugu, napparsimaneq assigisaaluunniit pissutigalugit Kalaallit Nunaata avataani najugaqarallarsimappat § 9, imm. 2, nr. 2 aamma 3-mi aamma imm. 3, nr. 2-mi piumasaqaatinit immikkut akuersinermik Naalakkersuisut nalunaaruteqarsinnaapput.

Imm. 2. Pissutsit immikkut ittut atuutsillugit inuussutissarsiutigalugu aalisarnerup nammineq angallatigisamit ingerlanneqarnissa pillugu § 10, imm. 1-imi piumasaqaatinit Naalakkersuisut immikkut akuersissuteqarallarsinnaapput, angallat umiarpal, sivisunerusumik siumullu naatsorsuutiginngisamik amutsivimmiippat imaluunniit pissutsit allat tamatumunnga assingusumik pisoqarpal angallallu nammineq pigisaq aalisarsinnaajunnaarpal. Immikkut akuersissuteqarnermi angallammik Kalaallit Nunaanni najugaqartutut nalunaarsorsimasumik attartortoqassaaq, angallammik Kalaallit Nunaanni najugaqartutut nalunaarsorsimasumik attartornissaq ajornarpal uppersarneqassaaq.

Imm. 3. Aningaasat akiligassaqfinnit pissarsiariniarneqareernerisa malitsigisaanik angallat imaluunniit pisassanit pigisat, tak. § 29, tunniunneqarsimappata § 9, imm. 2 aamma imm. 3-mi piumasaqaatiniit immikkut akuersinermik Naalakkersuisut nalunaaruteqarsinnaapput. Immikkut akuersineq atulersinsinermiit ukiumi ataatsimi atuutissaaq immikkorluinnarlu pisoqarnerani sivitsorneqarsinnaalluni.

Imm. 4. Naalakkersuisut aalajangersagaq taanna naapertorlugi immikkut akuersisimaneq piffissami killeqartissinnaavaat aamma erseqqinnerusumik piumasaqaatit allanneqartut piumasaralugit.

§ 12. § 10, imm. 1, naapertorlugu inuussutissarsiorluni aalisarnermi angallatinik siusinnerusukkut Kaalaallit Nunaanni aalisariutitut nalunaarsorneqarsimannngitsunik pisinissamut akuersissuteqaqqaartoqarnissa pillugu Naalakkersuisut erseqqinnerusumik malittarisassiorsinnaapput.
Imm. 2. Imm. 1 naapertorlugu akuersissutini piumasaqaatigineqarsinnaavoq angallat aalisakkanik aalajangersimasunik aalisarnermut atorneqassasoq angallalluunniit aalajangersimasumik pisaqarsinnaassusilik aalisarunnaarsinneqassasoq.

Nunat allamiut ingerlatsisut Kalaallit Nunaata aalisarnikkut oqartussaaffigisaani inuussutissarsiutigalugu aalisarnerat

§ 13. Nunamit allameersut Kalaallit Nunaata aalisarnikkut oqartussaaffiani inuussutissarsiutigalugu aalisarsinnaapput ingerlataqartoq nunat tamalaat akornanni isumaqtigiiissutit naapertorlugit imaluunniit Naalakkersuisuniit immikkut nalunaarfigineqarnikkut § 25-mi piumasaqaatinik naammassinnittumik akuersissuteqalersimappat.

Imm. 2. Imm. 1 naapertorlugu aalisarneq tunngaviusumik killigititamiit (basisliniamiit) 12 somilit iluanni ingerlaneqarsinnaanngilaq.

Kapitali 3

Kalaallit Nunaata aalisarnikkut oqartussaaffigisaata avataani aalisarneq

§ 14. Kalaallit Nunaata aalisarnikkut oqartussaaffiata avataani aalisarneq pillugu malittarisassanik erseqqinnerusunik Naalakkersuisut aalajangersaasinnaapput.

Imm. 2. Kalaallit Nunaata aalisarnikkut oqartussaaffigisaata avataani inuussutissarsiutigalugu aalisarneq §§ 9 aamma 10-mi piumasaqaatinik naammassinnittunit ingerlatsisunit taamaallaat aalisarfigineqarsinnaavoq, aamma tamatumunnga aalisarsinnaanermut akuersissummik Naalakkersuisut atulersitsisimatinnagit aalisarneq aallartinneqarsinnaanani.

Kapitali 4

Inuussutissarsiutigalugu aalisarneq pillugu malittarisassaliorneq

Malittarisassatigut aaqqiinerit

§ 15. Inuussutissarsiutigalugu aalisarnermik malittarisassaliorneq pillugu malittarisassanik erseqqinnerusunik Naalakkersuisut aalajangersaasinnaapput. Aqtsinissamut pilersaarutini akuerineqareersimasuni aalisarnerit eqqarsaatigalugit malittarisassat taakku aqtsinissamut pilersaarummut naapertuitissapput, tak. § 16. Naalakkersuisut ilaatigut makkununnga malittarisassanik atulersitsisinaapput:

- 1) pisariaqarsinnaasut annertussutsit piffissamut agguarneri, nunami sumiiffinni erseqqinnerusumik nassuiarneqartuni aamma innuttaasut katitigaanerini pingaarnersiuinernut naleqqiullugu,
- 2) aalisarnerup aallartinnera,

- 3) aalisarneq tamakkiisumik imaluunniit aalisarnerup ilanik unitsitsineq, aalisaqatigiinnik immikkut aalisarneqartussatut pineqartuni
- 4) angallatit ataatsimoortut ilaannut angallatinut ataasiakkaanut imaluunniit aalisarnermi atortunut erseqqinnerusumik aalajangersakkanik pisassiissuteqarluni pisarineqarsinnaasunik agguassineq,
- 5) pisat suliarinissaat siunertaralugu pisarineqarsinnaasut amerlassusaasa agguarnissaat,
- 6) piffissaq aalisarfiusinnaasoq sivisunerpaq, tulaassinerit amerlassusii aamma akuerisaasumik tulaassinermi ataatsimi pisarineqarsinnaasut amerlassusaat,
- 7) immikkut pisassiissutit pisarineqarsinnaasutut amerlassusilikkan piarisuukkat naammatsinniarlugit,
- 8) nunat tamalaat isumaqatigiissutaat pisussaaffillu naapertorlugit angallatinik nunanit allaneersunik attartorneq;
- 9) unioqqutitsisumik, nalunaarusiorneraqanngitsumik maleruagassaqartinneqanngitsumillu aalisarnerup pitsaaliorneqarnissaa, pinngitsoortinnejarnissaa unitsinnejarnissala, aamma
- 10) piffissani eqqisisimatisiviusuni piffissanilu allani aalisakkamik aalisaqatigiinnit aalajangersimasumik aalisarneq imaluunniit aalisaqatigiit arlaannik aalisarneqarsimasunik tunisineq inerteqqutaavoq.

Ukiunut arlalinnut aqutsinissamut pilersaarutit

§ 16. Naalakkersuisut Kalaallit Nunaata imartaani aalisagaqatigiinnut pingaarutilinnut aalisarnernullu tamanut ukiunut arlalinnut aqutsinissamik pilersaarutinik akuersissuteqartassapput.

Imm. 2. Aqutsinissamik pilersaarutinut siunnersuutit soqutigisaqartut suleqatigalugit aamma nunani tamalaani isumaqatigiissutit naapertorlugit suliarineqassapput ilisimatuussutsikkullu siunnersuineq isiginiarneqartassaaq.

Imm. 3. Aqutsinissamik pilersaarut ukuninnga imaqassaaq:

- 1) Aalisagaqatigiinnik imaluunniit aalisagaqatigiinnik arlalinnik aamma aalisarnernik kiisalu nunap immikkoortua pilersaarummut ilaatinneqartoq allaaserineqassapput.
- 2) Aalisarnerit pillugit aqutsinermi anguniarneqartut, aqutsinermut pilersaarummi ilaatinneqassapput, inatsisip anguniagaanut naapertuullutik, tak. § 1.
- 3) Aalisagaqatigiinnut kisitsositigut anguniakkat, taakkulu aalisarneqarnerisa sunnerneqarnerat inatsisip anguniagaanut naapertuuttut, tak. nr. 2.
- 4) Anguniakkat angunissaannut piffissaliussat.
- 5) Aalisagaqatigiinnut TAC-mik aamma imaluunniit pisassiissutinik aalajangersaanermut malittarisassat, nr. 3-mi nassuarneqartut, anguniakkanut naapertuuttussat.
- 6) Teknikikkut iliuuseqarnerit piujuartitsisussat pillugit malittarisassat anguniakkat pillugit pilersinneqartut, takuuq nr. 2 aamma 3.
- 7) Pilersaarutip nutarternissaanut suleriaasissaq piffissaliussarlu.

Imm. 4. Aqutsinissamik pilersaarutit aamma allanik imaqarsinnaavoq, soorlu uku:

- 1) Pisassiissutit agguarnissaannut malittarisassat.
- 2) Paassisutissanik katersinissamut pilersaarut, paassisutissanik katersineq nalinginnaasumik pilersaarutit avaqqullugit.
- 3) Immikkut nakkutilliinissamut malittarisassat, pilersaarutip naammassineqarnissaanut nakkutiginninnermullu pisariaqartut.

Imm. 5. Aqutsinissamik pilersaarutit akuerineqarsimasut, aqutsinissamik pilersaarutip pilersaarutaasumik nutarterneqarnissa sioqqullugu taamaallaat immikkut pisuni allangortinneqarsinnaapput, takuuk imm. 3, nr. 7.

Kapitali 5

Pisarineqarsinnaasut amerlassusissaannik aalajangersaaneq agguassinerlu

Akuerineqarsinnaasumik pisarineqarsinnaasut amerlanerpaffissaat

§ 17. Ukiuumoortumik pisarineqarsinnaasut amerlassusissaat (TAC) aqutsinissamik pilersaarut attuumassuteqartoq naapertorlugu aalisagaqtigiinnut ataasiakkaanut Naalakkersuisunit aalajangersarneqassaaq, tak. § 16. Aalisagaqtigiinnut aqutsinissamik pilersaarut akuerineqarsimannngippat ukiuumoortumik pisarineqarsinnaasut amerlassusissaat Naalakkersuisunit aalajangerneqassaaq.

Imm. 2. Aalisagaqtigiinnut TAC-mut ilaassapput Kalaallit Nunaata aalisarnikkut oqartussaaffigisaani pisassaat kiisalu nunani tamalaani isumaqtigiissutit naapertorlugin Kalaallit Nunaata aalisarnikkut oqartussaaffigisaata avataani kalaallit aalisartut pisassaat.

Imm. 3. Immikkorluinnaq pisoqartillugu TAC-mik Naalakkersuisut iluarsiisinnaapput. Iluarsiineq ilisimatuussutsikkut siunersiuinermit aamma Aalisarneq pillugu siunnersuisoqatigiinniit tunngaveqassaaq, tak. § 54.

Imm. 4. Imm. 1 apeqquatainnagu aalisagaqtigiit aqutsinermik pilersaarummut ilaangippata imaluunniit TAC-mi aqutsinissamut immikkut pissutissaqarluni tulluanngippat aalisagaqtigiinnut TAC-mik aalajangersaannginnissaq Naalakkersuisunit toqcarneqarsinnaavoq.

Pisassiissutit

§ 18. Naalakkersuisut aalisagaqtigiinnut ataasiakkaanut TAC-mik aalisariutit immikkoortuinut assigiinngitsunut nunat tamat akornanni isumaqtigiissutit aqutsinissamillu pilersaarutit attuumassuteqartut isigalugit agguassisassapput.

Imm. 2. Naalakkersuisut pisassiissutit ukiuumoortumillu pisassiissutit agguanneqarnissaannut piumasaqaatit pillugit sukumiinerusunik malittarisassiorsinnaapput aamma tassunga ilanngullugit pisassiissutit ukiuumoortumillu pisassiissutit pissarsiarineqarsinnaasut immikkoortiterneqarnissaat agguanneqarnissaallu pillugit sukumiinerusumik malittarisassiorsinnaallutik:

- 1) piffissaq,
- 2) sumiiffit,
- 3) aalisarnermi atortut assigiinngitsut,
- 4) inuussutissarsiuteqartut immikkoortui, aamma
- 5) aalisariutit immikkoortui.

§ 19. Akuersissutillip ukiumut pisassiissutit tamakkerlugit aalisarsinnaanngikkai ilimanarsippat agguasseqqinnissaq siunertaralugu ukiumut pisassiissutit tamaasa taakkuluunniit ilai Naalakkersuisut

utertissinnaavaat. Tamannali aalisakkanut kapitali 7-mi ilaatinneqartunut atuutinngilaq (pisassiissutit niuerutigineqarsinnaasut nammieq pigisat).

§ 20. TAC-p ilai akuersissummut imaluunniit § 18, imm. 1 naapertorlugu agguassinerup ilaanut ilaanngippata Naalakkersuisut:

- 1) pisassiissutit pigisatut pisassat tamaasa taakkuluunniit ilai tuniniarsinnaavaat tak. § 31,
- 2) pisassat ukiumut pisassiissutit tamaasa taakkuluunniit ilaa tuniniarsinnaavaat,
- 3) pisassiissutit ukiumut pisassiissutit tamaasa taakkuluunniit ilaa misileraalluni aalisarnermut taarsiissutit allamut tunniussinnaavaat, imaluunniit
- 4) pisassiissutit ilaa tamaasaluunniit nunanut allanut isumaqtigiiissutit naapertorlugit taakkununnga isumaqtigiiissutigisat tamaasa taakkuluunniit ilaa neqeroorutigisinnaavaat.

Imm. 2. Imm. 1, nr. 1 aamma 2 naapertorlugu tunisinermi iluanaarutit nunatta karsianut tutsinneqassapput.

Aalisarnerup unitsinnerra

§ 21. Aalisarneq ingerlaannaq unitsinnejassaaq

- 1) ingerlatsisut ataasiakkaat pisassatik tamakkerpatigit,
- 2) Kalaallit Nunaannut TAC, tak. § 17, tamakkerlugu aalisarneqarsimappat, taamaattoq tak. § 38, aamma
- 3) § 18 naapertorlugu pisassiissutit aalajangersarneqarsimasut tamakkerlugit aalisarneqarsimappata, taamaattoq tak. § 38.

Kapitali 6

Aalisarsinnaanermut akuersissuteqartaneq

Akuersissutit

§ 22. Aalisarnissamut akuersissut ingerlatsisunut ataasiakkaanut ukiumoortumik nalunaarutigineqartapoq, aamma pisarineqarsinnaasut amerlanerpaaffiannut attuumassuteqarsinnaalluni.

Imm. 2. Akuersissut Naalakkersuisunit atulersinneqassaaq.

§ 23. Naalakkersuisut akuersissutinik tunniussisarnernut aamma akuersissutit attatiinnarneqarnissaannut malittarisassanik aalajangersaasinnaapput, aamma akuersissutinut piumasaqaatit aalajangersinnaavaat, angallatit pisarineqarsinnaasut amerlassusaannut naleqqusaaanissaq ilaatgut siunertaralugu.

§ 24. Kalaallit Nunaanni tunisassiorfinnut pisanik tunisassiassanik tulaassisussaatitaaneq pillugu malittarisassanik Naalakkersuisut aalajangersaasinnaapput.

Imm. 2. Kalaallit Nunaata Kitaanili raajarniarnermi aalisarnermik ingerlataqartup ataatsip pisami 30 %-iink tulaassisarnissaa atuuppoq.

§ 25. Aalisarnermut akuersissummi paassisutissat uku allassimassapput:

- 1) Akuersissutaillip aqqa aamma Qitiusumik Suliffeqarfinnik Nalunaarsuiffimmi (CVR) normua.
- 2) Akuersissummut angallatit suut ilanngunneqarsimanersut, angallatip aqqa aamma ilisarnaatitut normua allassimassapput.
- 3) Aalisakkat suut akuersissut naapertorlugu aalisarsinnaatitaanersut.
- 4) Akuersissut naapertorlugu aalisakkat qanoq amerlatigisut aalisarsinnaatitaanersut.
- 5) Piffissap qanoq ilinerani akuersissut atuutissanersoq.
- 6) Nunap ilaani sumiifinni sorlerni aalisartoqarsinnaasoq.
- 7) Pisat qanoq amerlatigisut qenorlu angallammi suliarineqassanersut.

Imm. 2. Akuersissut aalisarnermut pineqartumut piumasaqaatinik amerlanerusunik imaqarsinnaavoq.

Imm. 3. § 28-mi malittarisassat tunngavigalugit atulersinneqarsimasunut akuersissutinut pisat amerlassusaat, tak. imm. 1, nr. 4 aamma TAC-mi pissarsiatut allanneqassapput, tak. § 17. Tamanna pillugu malittarisassat erseqqinnerusut Naalakkersuisunit aalajangersarneqarsinnaapput.

§ 26. Akuersissutip atulersinneqartup iluaqtiginissaanut pisinnaatitaaffigitinneqartoq Naalakkersuisunit killilerneqarsinnaavoq pisunilu sukannererusuni imaluunniit pisuni uteqqiaffiusuni akuersissut ukunani arsaarinissutigisinnaallugu:

- 1) Akuersissutit pillugit unioqqutitsisoqarpat.
- 2) Inatsisartut inatsisaanni aalajangersakkat imaluunniit taanna inatsit naapertorlugu malittarisassanik unioqqutitsisoqarpat.
- 3) Akuersissut amigartumik atorneqarpat.
- 4) Akiliummut akiliisoqarsimanngippat tak. § 27.

Akiliutit

§ 27. Naalakkersuisut sinerissap qanittuani avataanilu aalisarsinnaanermut akuersissutinik tunniussinerni akiliutigineqartussat pillugit erseqqissunik malittarisassaliorsinnaapput, aamma aalisarnissamut akuersinernut malittarisassaliorsinnaallutik. Aamma § 30, § 39, imm. 1, § 40 aamma § 41 naapertorlugit pisassiissutinit pigisanik ukumoortumillu pisassiissutinik pisassiinerni malittarisassaliorsinnaapput, tunniussinerni pisassiinernilu akiliutigineqartussanik akileeqqusisinnaallutik.

Imm. 2. Naalakkersuisut imm. 1 naapertorlugu akiliutinik akiliisarnerup allaffissornikkut aqunneqarnera pillugu sukumiinerusunik malittarisassiorsinnaapput, taakkununnga aamma ilanngullugu akiliinngitsoorsimasut akiitsuminnik, akiligassanik kingusinaartumik akiliinermi ernialiussat ilanngullugit, akiliitinnagut Inatsisartut aalisarneq pillugu inatsisaat naapertorlugu akuersissutinik aalisarsinnaanermulluunniit akuersissutinik nutaanik pissarsisinnaannginnerat pillugu aalajangersagaliorsinnaallutik.

Imm. 3. Akiligassanik akiliinngitsoqarpat, Inatsisartut inatsisaat una naapertorlugu, imaluunniit inatsimmi najoqqutassarineqartut naapertorlugit, kingusinnerpaamik akiliiffissaq nallerlugu akiliisoqarsimanngippat, akiligassaq qaammammut 1 procentimik ernialerneqartassaaq. Ernialiunneqartumut aningaasat ikinnerpaamik 50 koruuniusassapput.

Kapitali 7

Pisassiissutit niuerutigineqarsinnaasut nammineq pigisat

Pisassiissutinit pigisat

§ 28. Aalisagaqtigiinnut ukununnga pisassiissutinik pigisani pisassiissutit immikkoortiterner tunngavigalugit aalisartoqarpoq (pisassiissutit niuerutigineqarsinnaasut nammineq pigisat tunngavigalugit aalisarneq (PNNP)):

- 1) Kalaallit Nunaata kitaani raajarniarneq.
- 2) Tunumi raajarniarneq.
- 3) Kitaata avataani qaleralinniarneq.
- 4) Kitaani avataasiorluni qaleralinniarneq.
- 5) Kitaani 68°30N-p avannaani aamma 75°00N-ip kujataani sinerissap qanittuani qaleralinniarneq.
- 6) Kalaallit Nunaata kitaani saattuarniarneq.

Imm. 2. Naalakkersuisut aalisaqtigii allat pillugit imaluunniit sumiiffit aamma pillugit malittarisassanik aalajangersaanermikkut pisassiissutit immikkoortissinnaavaat pisassiissutit pigisatut agguagassangorlugit, aamma ukiumut pisassat pillugit malittarisassanik aalajangersaasinnaallutik.

Imm. 3. Imm. 1, nr. 5-mi aalisarneq pineqartillugu ingerlatsisut ataasiakkaat PNNP-mik aaqqissuussinermut ilaapput, pineqartoq Naalakkersuisuniit tamanna pillugu nalunaarummik tigusaqarsimappat. Nalunaarut allakkatigut qinnuteqarnerup kingorna pissaaq.

Imm. 4. Pisassiissutit ilaannut ingerlatsisup oqartussaaffigisai, tak. imm. 3, PNNP-mik aaqqissuussinermut nuussimannngitsunut immikkoortinneqarsimasunit pisassiissutit ilanngaatigineqassapput. Pisassiissutit PNNP-mik aaqqissuussinermut aalajangersarneqarsimasut akornanni pissutsit aamma pisassiissutit sinneruttut ingerlataqartut PNNP-mik aaqqissuussinermut ilanngunnerini tamatigut naatsorsorneqartarpot.

Imm. 5. Qinnuteqarneq, tak. imm. 3, qaqqukkulluunniit pisinnaavoq. PNNP-mik aaqqissuussinermut ilaasoq ingerlataqartoq ukiup ilivitsup aallartinneraniit ilaalissaq.

Imm. 6. Ingerlatsisoq toqqaannartumik toqqaannangitsumilluunniit imm. 1 naapertorlugu aaqqissuussinermut ilaasoq aaqqissuussineq alla atorlugu sinerissap qanittuani qaleralinniarnermut akuersisummik pisinnaanngilaq. Tamanna aamma PNNP-mik aaqqissuussinermut kingusinnerusumilu ingerlataqartup peqataaneranut atuuppoq.

§ 29. Inatsisip atulersinnerani §§ 8, 9-mut aamma 28-mut ingerlataqartut, inatsisillu atuutilernera ukioq sioqquillugu akuersissuteqartut, TAC-mi pineqartumi amerlanerpaanik pisarineqarsinnaasunik ingerlatsisumut tunniunneqartut taamaaqataannik naapertuuttunik pisassiissutinit pigisanik atusinnaatitaanermik tunineqassapput.

Imm. 2. Inatsisip atulersinnerani §§ 8, 9-mut aamma 28-mut ingerlataqartut, inatsisillu atuutilernera ukioq sioqquillugu aalisagaqtigiinni pisassiiffiusuni aalisarnissamut pisinnaatitsisumik akuersissuteqartut, aamma amerlanerpaanik pisarineqarsinnaasunut atassuteqannngitsunik, ingerlatsisup PNNP-mik aaqqissuussinermut ilaalernera sioqquillugu piffissami ukiuni kingullerni tallimani pisat tamakkiisumik nalunaarsorneqarsimasut ilaannik angallatip pisarisimasai tunngavigalugit aalisagaqtigiinni ataatsimi pisassiissutit ilaanni iluaquteqarsinnaanermut pisinnaatitaaffimmik tunineqassapput.

Imm. 3. Pisassiissutinit pigisat, tak. imm. 2, peqassutsinut ataasiakkaanut ingerlataqartup tunngaviusumik amerlassusii ingerlataqartut tamarmik tunngaviusumik amerlassusiisa katinnerinit agguarnerisigut naatsorsorneqartassapput, peqassutsimut pineqartumut PNNP-mik eqqussinermi immikkut siunertanut immikkoortinnejarsimmasinnaasut ilanngaatigalugit. Ingerlatsisup pisaasa amerlassusii tunngavigalugit piffissami ukiuni tallimani ukiumoortumik ingerlatsisut aalisernerani amerlanerpaat pingasut katinnerisa inernerannit naatsorsorneqartarput, imm. 2-miuttoq tunngavigalugu naatsorsorneqassaaq.

Imm. 4. Aalisagaqatigiinnut inatsisip akuerineqarnerata kingorna aatsaat PNNP-mut aaqqissuussamut ilaalersut pillugit pisassiissutinit pigisanik tunniussineq pillugu malittarisassanik erseqqinnerusunik Naalakkersuisut aalajangersaassapput.

Ukiumoortumik pisassiissutinik aamma pisassiissutinik pigisanik kaaviaartitsineq

§ 30. Pisassiissutinit pigisat, tak. § 28, pigisassatut imaluunniit qularnaveeqqutitut tunniunneqarsinnaapput aamma kingornunneqarsinnaallutik.

Imm. 2. Kalaallit Nunaata kitaani raajarniarnermi pisassiissutinit pigisat, toqqaannanngitsumik pigisat ilanngullugit, § 32, imm. 1 naapertorlugu, inatsisartut inatsisaat atuutilermat sinerissap qanittuani raajarniarluni ingerlatsisumit pigineqartut, angallammi tunisassiorissamut marsip aallaqqaataani 2024-mi akuersissuteqanngitsumit angallammi tunisassiorissamut marsip aallaqqaataani 2024-mi akuersissutilimmun tunineqarsinnaangillat.

Imm. 3. Pisassiissutinik pigisanut aamma ukiumoortumik pisassiissutinut kaaviaartitsinermut kiisalu Naalakkersuisunut nalunaaruteqarnernut malittarisassanik erseqqinnerusunik Naalakkersuisut aalajangersaasinnaapput.

§ 31. Pisassiissutinik pigisanut aamma ukiumoortumik pisassiissutinut kaaviaartitsinermut, matumani ilanngullugit pisassiissutinut pigisanut aamma ukiumoortumik pisassiissutit amerlassusaannut, Naalakkersuisunut tutsinneqartussanut atugassamik neqeroortitsinermut nittartakkamik Naalakkersuisut pilersitsissapput.

Imm. 2. Pisassiissutinik pigisanut aamma ukiumoortumik pisassiissutinut Naalakkersuisunut tutsinneqartunut, tak. imm. 1, Naalakkersuisut suliariumannittussarsiuussinertut ilusilimmik neqeroorutigineqassapput.

Imm. 3. Suliariumannittussarsiuussinermut atatillugu suliariumannittussarsiuussinermi peqataasunut piumasaqaatit tunngavilersuillu pillugit erseqqarinnerusumik malittarisassanik Naalakkersuisut aalajangersaasinnaapput.

Pisassiissutinit amerlanerpaanik pigisat pillugit malittarisassat

§ 32. Inatsisitigut akisussaatitaasut pisussaatitaasullu toqqaannartumik imaluunniit toqqaannanngitsumik, Kalaallit Nunaanni TAC-nik normu 1-imut 5-imut taaneqartunik pigisat sinnerlugit pisassiissutinit pigisanik pigisaqqusaanngilaq, taamaattoq imm. 3 aamma 4 tak. Tassunga atatillugu piginninneq taasisinnaatitaanerit assigisaalluunniit aqqutigalugit taamaaqataanik sunniuteqarnernut naliqissinneqarpoq.

1) Kalaallit Nunaata kitaani raajarniarneq: 20,000%.

- 2) Tunumi raajarniarneq: 33,333%.
- 3) Kalaallit Nunaata Kitaani sinerissap qanittuani qaleralinniarneq, tak. § 28, imm. 1, nr. 5: 2,500%.
- 4) Kalaallit Nunaata kitaani saattuarniarneq: 17,000%.
- 5) Kalaallit Nunaata kitaani § 28, imm. 1-imut ilaasunik aalisagaqtigiinnik assigiinngitsunik avataasiorluni aalisarneq: 20,000%.

Imm. 2. Inuit ataasiakkaat arlaannaalluunniit, taakku qanigisaat ilanngullugit, toqqaannartumik imaluunniit toqqaannaanngitsumik Kalaallit Nunaannut TAC-ni pigisanik normu 1-imiit 3-mut allassimasut qaangerlugit pisassiissutinit pigisaqqusaanngillat. Tassunga atatillugu piginninneq taasisinnaatitaanerit assigisaalluunniit aqquitalugit taamaaqataanik sunniuteqarnernut naligiissinneqarpoq.

Soraarnerussutisianut karsit arlaanni ilaasortaanikkut pisassiissutinit pigisanik pigisaqrneq pisassiissutinit pigisanik inuup tamakkiisumik pigisaata naatsorsornerinut ilaassanngillat.

- 1) Kalaallit Nunaata kitaani raajarniarneq: 12,500 %
- 2) Kalaallit Nunaata kitaani sinerissap qanittuani qaleralinniarneq: 2,500%
- 3) Kalaallit Nunaata kitaani saattuarniarneq: 12,500%

Imm. 3. Ingerlatseqatigiiffit pisortanit pigneqartut toqqaannartumik imaluunniit toqqaannaanngitsumik Kalaallit Nunaannut TAC-ni pigisanik normu 1)-imiit 5)-imut allassimasut qaangerlugit pisassiissutinit pigisaqqusaanngillat. Tassunga atatillugu piginninneq taasisinnaatitaanerit assigisaalluunniit aqquitalugit taamaaqataanik sunniuteqarnernut naligiissinneqarpoq.

- 1) Kalaallit Nunaata kitaani raajarniarneq: 33,333%
- 2) Tunumi raajarniarneq: 33,333%
- 3) Kalaallit Nunaata kitaani sinerissap qanittuani qaleralinniarneq: 2,500%
- 4) Kalaallit Nunaata kitaani saattuarniarneq: 17,000%
- 5) § 28, imm. 1-imut ilaasunik Kalaallit Nunaata kitaani aalisagaqtigiinnik assigiinngitsunik avataasiorluni aalisarneq: 40,000%

Imm. 4. Ingerlataqartut sukkulluunniit upternarsarsinnaassavaat imm. 1-2-imi piumasaqaatit naammassisimallugit.

Imm. 5. Tigusisussamut ukiumut pisassiissutit tamarmiusut aalisarnermut pineqartumut pisassiissutit amerlassusaasa killingat qaangissanngilaat, aalisarnermut tamatumunnga killigitinneqartut amerlaqatigaat.

Imm. 6. Aalisagaqtigiinnut, inatsisip atortuulereerneratigut pisassiissutit nammineq pigisat nioqqutigineqarsinnaasullu pillugit malittarisassanut ilaasut, pisassiissutit pigisat ingerlatsisup pigisinnaasaasa annertussutsimkkut annerpaaffissaat aalajangersarneqassaaq.

Imm. 7. Pisassat amerlanerpaaffissaat imm. 3, nr. 1-imi taaneqartut appartissinnaaneri pillugit Naalakkersuisut maleruagassiorsinnaapput. Appartitsinerit inuaqatigiinnut pisussaaffit, pisortat ingerlatseqatigiiffutaasa pisussaaffiligassaat piffissaqarluarlunilu nalunaaruteqarnissamut piffissarititaasut isiginiarlugit ingerlanneqassapput.

Imm. 8. Oqaaseqatigiit siullit kingorna aalajangiussaq pillugu Naalakkersuisut Inatsisartunut immikkut ilisimatitsissuteqassapput.

§ 33. Akuersissut ukiumoortumik nalunaarutigineqartassaaq, tak. § 22, piffissaq pisassiissutinik piginniffiusoq sivikinnerpaaq imaassalluni:

- 1) Kalaallit Nunaata kitaani raajarniarneq: Ukiut 10.
- 2) Tunumi raajarniarneq: Ukiut 10.
- 3) Kalaallit Nunaata kitaani avataasiorluni qaleralinniarneq: Ukiut 10.
- 4) Kalaallit Nunaata kitaata sineriaata qanittuani qaleralinniarneq: Ukiut 10.
- 5) Kalaallit Nunaata kitaani saattuarniarneq: Ukiut 10.

Imm. 2. Aalisagaqatigiinnut, pisassiissutit nammineq pigisat nioqqutigineqarsinnaasullu kingusinnerusukkut ilaalersut pillugit malittarisassat, pisassiissutinut pigisanut tunniunneqartunut piffissap qanoq sivisutiginissa Naalakkersuisut aalajangersassavaat.

Pisassiissutinik immikkut niuerutigineqarsinnaasunik atorunnaarsitsineq

§ 34. Piffissap pisassiissutinik piginniffiusup sivisoqataanik ilimasaarinikkut pisassiissutit pigisat Naalakkersuisut atorunnaarsissinnaavaat. Pisassiissutinik atorunnaarsitsineq ukumi ataatsimi amerlanerpaamik 20 % tikillugu pisassiissutinik tunniunneqarsimasuni atorunnaarsinnejqarsinnaallutik.

Imm. 2. Pisassiissutinik pigisat, imm. 1 malillugu atorunnaarsinneqartut, pisassiissutinik aguaasseqqinnissaq siunertalarugu Naalakkersuisunut tutsinneqassapput, tak. § 31.

Pisassiissutinik nammineq pigisanik nioqqutigineqarsinnaasunik pisassiissutinik atuineq.

§ 35. Pisassiissutinit pigisanik piginnittoq ukiumoortumik pisassiissutit 75%-iisa aalisarnissaannut pisussaaffeqarpoq, taamaattoq tak. § 39, imm. 4.

§ 36. Pisassiissutinit pigisat pissariarineqarnermik imaluunniit akuersissummut atajunnaarnermik kingorna qaammatit 18-it qaangiutsinnagit angallammut ataatsimut arlalinnulluunniit atassuteqartinneqaqqilersimassapput angallatinik taakkuninnga piginnittunut akuersissummik tunniussinikkut.

Imm. 2. Piginnittup, akuersissutip angallammut attuumassuteqalernissaata tungaanut, piffissaliussap iluani pisassiissutit tamaasa ilaannakortumilluunniit tunisinnaavai.

Imm. 3. Angallatip umiunerani imaluunniit pissutsit immikkorluinnaq ittut atuunnerini, imm. 1 naapertorlugu Naalakkersuisut, immikkut akuersissummik piffissamik aalajangersimasumik nalunaaruteqarsinnaapput.

§ 37. Ingerlatsisunut nutaanut § 36, imm. 1-imi piffissaliussaq taaneqartoq qaammatit 24-t atuutissaaq, ingerlatsisut:

- 1) siusinnerusukkut toqqaannartumik toqqaannanngitsumilluunniit pisassiissutinit pigisassanik peqarsimanngippata,
- 2) pisassiissutinit pisassanut siusinnerusukkut aalajangiisuuusumik sunniuteqarsimanngippata, imaluunniit
- 3) piffissaliussap iluani pisassiissutit pigisani annerpaaq 1/4-mik qaangersimappassuk, tak. § 32.

§ 38. Aalisarnermik ingerlatsisoq ukiumi pisassiissuteqarfiusumi ukiumut pisassiissutit 25 %-iinik ukiup tulliani pisassiiffiusumit pisassiiffiusumulluunniit nuussisinnaavoq (pisassiissutit nuunneqarsinnaasut).

Imm. 2. Pisassiissutinut nuunneqarsinnaasunut piumasaqaatinik matuman iilanngullugu imm. 1 naapertorlugu piffissami aalisarnermi sorlermi annertussutsinik nuussinerup pinissaanik Naalakkersuisut aalajangersaasinnaapput.

§ 39. Aalisarnermik ingerlatsisoq ingerlatisumut allamut ukiumut pisassiissutit 10 %-ii tikillugit nuussisinnaavoq (ukiumut pisassiissutinik tuniniaaneq).

Imm. 2. Ukiumut pisassiissutinik nuussineq, tak. imm. 1 aamma imm. 4, ukiumut pisassiissutit nalunaarutigineqartut § 25 naapertorlugu ilanngaatigineqartassapput, taamaattorli imm. 4 takuuk.

Imm. 3. Ukiumut pisassiissutinik nuussisoqartillugu ukiumut pisassiissutit ilaannik nuunneqartunik pisassiissutinik nuunneqarsinnaasumik atuisinnaaneq annikillisinneqassaaq.

Imm. 4. Teknikkut, aningaasaqarnikkut, niuernermut tunngasutigut imaluunniit allanik immikkut pissuteqartumik ukiumi pineqartumi ukiumut pisassiissutit minnerpaamik 75 %-iisa aalisarnissaannut periarfissaqanngivissortoq ingerlatsisup uppernarsarsinnaappagu ukiumut pisassiissutinit 10 % qaangerlugu tunniussinissamut Naalakkersuisut akuersillutik nalunaaruteqassapput.

Imm. 5. Ukiumut pisassanik tunniussineq pisassiissutinit pigisanik atukkiussinertut isikkoqanngisaannassaaq.

Pisassiissutit pinngitsaaliinikkut nuunneqartarnerat

§ 40. Pisassiissutinik piginnittoq, pisassiissutini qaqineqanngitsuni pisassiissutit tuniniarnissaanut pisussaaffeqalissaq:

1) ukiuni pingasuni tulleriittuni § 35-p naammassinissaa periarfissaasimangippat;

2) § 36, imm. 1-ip naammassinissaa periarfissaasimangippat, imaluunniit

3) § 37, imm. 1-ip naammassinissaa periarfissaasimangippat.

Imm. 2. Imm. 1, nr. 1 naapertorlugu tuniniaaneq ukiut pingasut taakku qaangiutsinnagit pisimassaaq. Imm. 1, nr. 2 aamma 3 naapertorlugit tuniniaaneq § 36-mi taamatullu § 37-mi piffissaliunneqartut qaangiutsinnagit pisimassaaq.

Imm. 3. Pisassiissutinik piginnittup imm. 1 naapertorlugu pisussaaffiusoq naammassinngippagu, § 31-mi malittarisassat malillugit pisassiissutinik pigisanik tuniniaaneq piginnittoq sinnerlugu Naalakkersuisut ingerlatissavaat.

Imm. 4. Naalakkersuisut imm. 1-3 naapertorlugu tunisinermi malittarisassanik erseqqinnerusunik aalajangersaasinnaapput.

§ 41. Akuersissut atorunnaarsitaasimappat pisassiissutinik pigisanik piginnittoq pisassiissutit pigisat tuniniarnissaannut pisussaaffeqarpoq, tak. 26, imm. 1. Tunisineq atorunnaarsitsinermit qaammatit arfinillit iluanni pissaaq.

Imm. 2. Pisassiissutinik piginnittup imm. 1 naapertorlugu pisussaaffiusoq naammassinngippagu, § 31-mi malittarisassat malillugit pisassiissutinik pigisanik tuniniaaneq piginnittoq sinnerlugu Naalakkersuisut ingerlatissavaat.

Imm. 3. Naalakkersuisut imm. 1 aamma imm. 2 naapertorlugu tunisinermi malittarisassanik erseqqinnerusunik aalajangersaasinnaapput.

Kapitali 8

Aalisariutini inuttat

§ 42. Inuttanut piumasaqaatit pillugit aamma inuttat qanoq katitigaaneri pillugit Naalakkersuisut sukumiinerusumik malittarisassiorsinnaapput.

Kapitali 9

Usinik nuussineq, tunisineq suliareqqiinerlu

Usinik nuussineq

§ 43. Naalakkersuisut Kalaallit Nunaata aalisarnikkut oqartussaaffigisaani tulaassinissaq usinillu nuussisarneq kiisalu Kalaallit Nunaata aalisarnikkut oqartussaaffigisaata avataani kalaallit aalisariutaasa tulaassisarnerat usinillu nuussisarnerat pillugit malittarisassaliorsinnaapput.

Imm. 2. Kalaallit aalisariutaannit nunallu allamiut aalisariutaannit usinik nuussinerit tamarmik taamaallaat Naalakkersuisut akuversissuteqarnerisigut pisinnaapput.

Tunisinerit

§ 44. Tunitsiviit tunisassiorfillu nutaat kiisalu tunisassiorfiup aalisakkanut allanut tunitsivinngorlugu imaluunniit tunisassiorfinngorlugu allanngortinnea pineqartumi kommunimiit akuersisoqqaartinnagu pilersinneqaqqusaaingilaq.

Imm. 2. Tunitsivinnik tunisassiorfennillu nutaanik pilersitsinissaq pillugu, tunitsiviit pioreersut allanngortinneri pillugit aamma angallatinik tunitsiviliiineq pillugu kiisalu aalajangersagaq manna naapertorlugu tunniunneqartunik akuversissutinik utertitsineq pillugu malittarisassanik erseqqinnerusunik Naalakkersuisut aalajangersaasinnaapput.

Imm. 3. Tunitsiviit niuerakkut malitassaasa assigiaarneri pillugit malittarisassanik erseqqinnerusunik Naalakkersuisut aalajangersaasinnaapput.

Suliareqqiineq

§ 45. Kalaallit aalisariutaanni taamaallaat suliareqqisoqarsinnaavoq Naalakkersuisut tamatumunnga akuersillutik nalunaaruteqarsimappata.

Kapitali 10

Eqqissimatitsineq, piujuartitsinissaq siunertaralugu teknikikkut iliuusissat il.il.

§ 46. Naalakkersuisut pisuussutit illorsorneqarnissaat pillugit malittarisassanik aalajangersaasinnaapput, tassunga ilanngullugit:

- 1) piffissat eqqissisimatitsiviusut aamma sumiiffimmiit sumiiffimmut tamakkiisumik ilaannakortumilluunniit aalisarfigeqqaanngitsut,
- 2) angallatinik, aalisarnermi atortunik taakkulu atortuinik aaqqissuussineq atuinerlu,
- 3) aalisarnermi ileqqorissaarnissamut malittarisassat,
- 4) Aalisakkanut assigiinngitsunut allanullu minnerpaaffissaliinerit.
- 5) nigartat angissusissaat taakkulu uuttortarneqarnissaat, kiisalu,
- 6) aalisakkanik allanik aalisarnermi aalisakkanik aalajangersimasumik annertunerpaamik saniatigut pisarineqarsinnaasut.

Imm. 2. Naalakkersuisut piginnaatitsissuteqareernerisigut malittarisassat imm. 1, nr. 1-3-mi taaneqartut pillugit kommuninut ataasiakkaanut kommunimut ileqqoreqqusamik communalbestyrelsi aalajangersaasiinnaavoq. Ileqqoreqqusat Naalakkersuisunit akuerineqassapput.

Kapitali 11

Aalisarnermi uumassusilinnik misissuinerit misileraallunilu inuussutissarsiutigalugu aalisarnerit

Aalisarnermi uumassusilinnik misissuinerit ilinniagaqarnermullu atatillugu aalisarnerit

§ 47. Aalisarnermi uumassusilinnik misissuinissamut Naalakkersuisut akuersissuteqarnissaat piumasqaataavoq, taamaattoq imm. 3 takuu.

Imm. 2. Naalakkersuisut Nunatsinni Pinngortitalerifflimmit oqaaseqaammik pissarsiniassapput aalisarnermi uumassusilinnik misissuinissamut akuersisummik tunniussisoqarnissaanut nalilersuinissamut atugassamik, takuu imm. 1.

Imm. 3. Pinngortitaleriffl Naalakkersuisunit akuersisummik peqqaanngikkaluarluni aalisarnermi uumassusilinnut misissuinernik ingerlatsisinnaavoq.

Imm. 4. Ilanniartitsinissaq siunertaralugu aalisarneq aalisarnermut killilersuutaasut atuuttut apeqquatainnagit Naalakkersuisut akuersissuteqarnerisigut ingerlanneqarsinnaavoq.

Imm. 5. Aalisarnermi uumassusilinnut misissuinerit aalisarnerup ingerlannissaanut malittarisassanut atuuttunut ilaangillat. Naalakkersuisulli akuersissutini imm. 1 aamma 4, malillugit atortussanngortinneqartuni misissuinissanut malittarisassanik erseqqinnerusunik aalajangersaasinnaapput.

Imm. 6. Naalakkersuisut aalisarnermi uumassusilinnut misissuinerit kiisalu ilinniarneq siunertaralugu aalisarnerit pillugit malittarisassiorsinnaapput, matumanilu ingerlannerinut kiisalu nalunaaruteqarnernut tunngasunik malittarisassat ilanngullugit eqqarsaatigalugit.

Inuussutissarsiutigalugu misileraalluni aalisarneq

§ 48. Inuussutissarsiutigalugu misileraalluni aalisarnissamut Naalakkersuisunit akuersissuteqarnissaq piumasqaataavoq.

Imm. 2. Inuussutissarsiutigalugu misileraalluni aalisarnissamut qinnuteqaatit Naalakkersuisunut nassiunneqassapput, makkuninngalu imaqassallutik:

- 1) Misileraalluni aalisarnermi siunertamut nassuaat, tassaniissalluni misileraalluni aalisarnerup aalisarnermi sutigut naleqarnerulersitsinissamut iluaqutaasinnaanera naatsorsuutigineqarsinnaanersoq.

- 2) Misileraalluni aalisarnerup ingerlanneratigut, angusassallu ilimagineqartut tunniunnerisigut misileraalluni aalisarnermi ilimagineqarsinnaasut allaaserinerat.
- 3) Misileraalluni aalisarnerup nalunaarusiorfiginerata allaaserinera, soorlu angusarineqartunik tamanut saqqummiussineq.
- 4) Misileraalluni aalisarnerup aningaasalorsornissaa pillugu paassisutissat, matumanilu Naalakkersuisunit tapiissuteqartoqarnissaanik qinnuteqartoqarsimanersoq.

§ 49. Naalakkersuisut, inuussutissarsiutigalugu misileraalluni aalisarnissanut ataasiakkaanut piumasqaatinik erseqqinnerusunik aalajangersaassapput, matumanilu misileraalluni aalisarnermut naammassinninnissamut maleruagassat, nalunaarsuineq taamatullu inuussutissarsiutigalugu misileraalluni aalisarneq nalinginnaasumik aalisarnermik kinguneqassappat kikkut aalisarsinnaatitaanersut.

§ 50. Ingerlatsisoq inuussutissarsiutigalugu misileraalluni aalisarnissamut akuersissummit angusaqarsimasoq akuersissummi aalajangersarneqartutut misileraalluni aalisarnerup ingerlannissaanut nalunaarusiorfigisarnissaanullu pisussaaffeqarpoq, takuuk § 48.

Imm. 2. Inuussutissarsiutigalugu misileraalluni aalisarnermut pilersaarutini allannguutit pingaarutillit, tak. § 48, imm. 2, Naalakkersuisunit akuerineqarsimassapput.

Imm. 3. Inuussutissarsiutigalugu misileraalluni aalisarnissamut akuersissummut piumasqaatit eququutsinneqanngippata akuersissut arsaarinnissutigineqarsinnaavoq.

Kapitali 12

Paasisutissat

Paasisutissanik katersineq suliaqarnerlu

§ 51. Inatsimmik matuminnga aqutsinermut paasisutissat pisariaqartinneqartut katersorneqarnissaat, suliarineqarnissaat ingerlateqqinnissaallu Naalakkersuisut akisussaaffigaat. Naalakkersuisut tassunga atatillugu nakkutilliinermi siunertanut pisortat nalunaarsuiffit ataatsimut ingerlassinnaavaat.

Imm. 2. Naalakkersuisut paasisutissat pillugit tamakkiisumik takussutissiussapput, takuuk imm. 1. Tamakkiisumik takussutissiamiissapput oqartussat, suliffeqarfit, allalluunniit katersinermik suliarinninnermillu isumaginnissimasut pillugit paasisutissat.

Imm. 3. Naalakkersuisut aalisarsinnaanermut akuersissummit tunineqarsimasunut imaluunniit kalaallit erfalasuat atorlugu angallatinik piginnittunut atuisunulluunniit, angallatinik nunanit allanit pigineqartunik piginnittunut atuisunulluunniit Kalaallit Nunaannit akuersissuteqarlutik aalisartunut, kiisalu aalisakkerivinnut allanullu, paasisutissanik aalisarnerup aqunneqarnissaanut pisariaqartinneqartunik tunniusseqquisinnaapput. Tassunga ilaatigut ilaapput akuersissummit piginnittut aalisakkerivinnillu piginnittut, ingerlatseqatigiiffinnik piginnittuunermut tunngasut, angallatit sorliit atorneqarnersut, pisat, tulaassinerit, nunami tunisassiorneq, pisassiissutinik niuerneq, suliffeqarneq aamma aalisarnermi nunamilu tunisassiornermi aningaasaqarneq pillugit paasisutissat.

Imm. 4. Nalunaarsuutinik pilersuisut, takuuk imm. 3, paasisutissanik qanoq Naalakkersuisunut tunniussinissaat pillugu malittarisassanik Naalakkersuisut aalajangersaasinnaapput.

Imm. 5. Naalakkersuisut paasissutissat ketersorneqarnissaannut, suliarineqarnissaannut ingerlateqqinnissaannullu akuersissutip oqartussanut, suliffeqarfinnut allanullu, soorlu suliffeqarfinnut namminersortunut, tamakkiisumik ilaannakortumilluunniit tunniussinissaq, tak. imm. 2, pillugu maleruagassiorsinnaapput.

Imm. 6. Ilisimatuussutsikkut atugassanik paasissutissanik katersinissaq siunertaralugu ilisimatuussutsikkut alaatsinaattunik ilaasoqarnissamut angallatip naalagaata pisussaaffilernissaa pillugu malittarisassanik Naalakkersuisut aalajangersaasinnaapput.

Paasissutissanik pissarsisinnaaneq ingerlatitseqqittarnerlu

§ 52. Naalakkersuisut paasissutissat ketersorneqartut aqtsinermik, nakkutilliinermut, misissueqqissaarinertertut ilisimatusarnermillu siunertaqartunut atugassanngortissavaat.

Imm. 2. Naalakkersuisut tamanut saqqummiussinikkut allatigulluunniit tamakkiisumik takussutissiamik makkuninnga imaqaqtunik tamanut pissarsiarineqarsinnaasunngortitsisinnaapput:

- 1) Akuersissummik piginnittut, akuersissutit taakkunani atukkat aalisarnermilu suliarinniffit suliffissuit allassimasut kiisalu taakkunani piginnittut aaqqissugaaneri pillugit paasissutissat, tassunga ilanngullugu taakku pisassiissutinit pigisarinnaasat naatsorsorneri,
- 2) TAC-t aamma peqassutsinut ataasiakkaanut pisassiissutit, ilisimatuussutsikkut siunnersuineq aamma pisassiissutit aalisartut akornanni agguarneri pillugit paasissutissat,
- 3) Pisassiissutit amerlassusiat pisassiissutinilu pigisat aalisagaqtigiiinnut aamma akuersissutinik pigisalinnut agguataarlugit;
- 4) Aalisariutit pillugit paasissutissat, tassunga ilanngullugit teknikkut paasissutissat, piginnaasaq, pisinnaasat, pisassiissutinik atuineq, tunisat annertussusii aamma tunisat nalingi;
- 5) Tunisat annertussusii aamma tunisinerit nalingi suliffissuarnut agguarneri pillugit paasissutissat;
- 6) pisassiissutinik niuerterit pillugit paasissutissat, aamma
- 7) aalisagaqtigiiinni ataatsini pisassiissutit iluaqtigineri ukiullu pisassiiffusut pillugit paasissutissat.

Imm. 3. Naalakkersuisut takussutissiaq ingerlaavartumik tamanut saqqummiuttassavaat nutartertarlugulu.

§ 53. Inatsisartut ukiakkut ataatsimiinneranni aalisarnermi ineriertorneq pillugu ukiumoortumik nalunaarut Naalakkersuisut saqqummiutissavaat. Ukiumoortumik nalunaarut Kalaallit Nunaata aalisarnikkut aningasaqarneranik aamma aalisarnernik aqtsinermik imaqqassaaq, tassunga ilanngullugit paasissutissat ketersorneqartut taakkulu atorneqarneri pillugit takussutissiaq, aqtsinermi pilersaarutit atuuttut, aqtsinermi pilersaarutit nutarterneqarsimasut aamma allaassutaasinnaasut aamma aalisakkerivinnut inatsisini malittarisassat atuuttut pillugit takussutissiaq tassunga ilanngullugit oqartussaaneq pillugu aalajangersakkat suut atorneqarsimanersut.

Kapitali 13

Aalisarneq pillugu Siunnersuisoqatigiit

§ 54. Naalakkersuisut Aalisarneq Pillugu Siunnersuisoqatigiit pilersissavaat, taakku suliassaraat Naalakkersuisunut oqaaseqaateqarnissaq.

Imm. 2. Naalakkersuisut Aalisarneq Pillugu Siunnersuisoqatigii qinnuigisinnavaat uku pilligit oqaaseqaateqarnissamut:

- 1) inuussutissarsiutigalugu aalisarnerup ingerlanneqarnissaa aaqqiiffingineqarnissaalu pilligit pilersaarusrusorneq malittarisassaliornelu,
- 2) pisaqarsinnaassutsip, pisassiissutit, aalisarnermi atortunik atuinissap, umiarsuarnik tunitsivilinissat kiisalu pisanik kaaviiartinneqarnissap aalajangersarneqarnerat, aamma
- 3) aalisarnerup inuussutissarsiutit nungusaataanngitsumik ineriertortinnejarnera siuarsarniarlugu suliniutit.

Imm. 3. Naalakkersuisut suliad kinguartinneqarsinnaanngitsut pilligit Aalisarneq pillugu Siunnersuisoqatigiinni ilaasortat tamakkerlugin allakkatigut tusarniaafffigisassavaat.

Imm. 4. Aalisarnermi soqutigisaqaqatigii kattuffi attuumassutillit ilaasortangortinnejarnissaapput. Naalakkersuisut ilaasortaanermut piumasaqaatinik aamma siunnersuisoqatigii katitigaanerannut malittarisassanik erseqqinnerusunik aalajangersaasinnaapput.

Imm. 5. Aalisarneq pillugu Siunnersuisoqatigii suliaminut qanoq suleriuseqassanerlutik aalajangersaassapput.

Imm. 6. Naalakkersuisut Aalisarneq pillugu Siunnersuisoqatigii ataatsimiinneranni allattoqarfimmik isumaginnissapput, kiisalu taakku ataatsimiinnerinut atasunik aningaasartuutit akilertassallugit.

Kapitali 14

Nakkutilliineq

§ 55. Inatsisartut inatsisaanni uani aalajangersakkanik inatsillu naapertorlugu malittarisassanik malinnittoqerneranik nakkutilliineq pillugu Naalakkersuisut sukumiinerisunik malittarisassiorinnaapput.

Imm. 2. Nunat tamat isumaqatigiissutaat naapertorlugin Kalaallit Nunaata nakkutilliinissamut pisussaaffimminik naammassinninnissaa siunertaralugu Naalakkersuisut aalisarnermik nakkutilliineq pillugu sukumiinerusunik malittarisassiorinnaapput.

Imm. 3. Pisat Inatsisartut inatsisaannut uunga akerliusumik pisarineqarsimasut allanut tunniunneqarnissaat, pisarineqarnissaat tuniniarneqarnissaallu pinngitsoortinniarlugu Naalakkersuisut makku pilligit malittarisassiorinnaapput:

- 1) pisanik pissarsisimaneq pillugu paassisutissiinissamut pisussaaffeqarneq;
- 2) ingerlatalinnit aalisarsinnaatitaanngitsunit pisaannik tigusinissamut inerteqquteqarneq, kiisalu
- 3) pisarineqarsinnaasut pisarereernerisa kingorna pisanik tigusinissamut inerteqquteqarneq.

Imm. 4. Aalisakkanik tulaassineq, aalisariutit aamma aalisakkanik assartuutit aaqqissugaaneri ingerlannerilu, nakkutilliisoqarnissaanik pisariaqartutut missilornera pillugu malittarisassanik erseqqinnerusunik Naalakkersuisut aalajangersaasinnaapput.

§ 56. Nakkutilliinermi Oqartussat kalaallit nunaata aalisarnikkut oqartussaaffigisaani aalisartunut angallatinut tamanut, nunat tamalaat imartaanni aalisartunut kalaallit angallataannut ikisinnaapput, nakkutilliineq nunat marluk imaluunniit nunat tamalaat isumaqatigiissutaat naapertorlugu nakkutilliisoqartillugu, aamma aalisarnermi atortunik pisanullu atatillugu misissuisinnaallutik.

Imm. 2. Nakkutilliinermi Oqartussat aalisarnermik ingerlatsisup aalisarsinnaatitaanerminut uppernarsaammik atuuttumik takutitsinissaa piumasarisinnaavaat.

Imm. 3. Pisinnaataaffit imm. 1-imi aamma 2-mi taaneqartut eqqartuussivik siumut aalajangiiseeqqaarnagu pissusissamisoortumik kinaassutsimut uppernarsaammik takutitsinikkut ingerlannegarsinnaapput.

Imm. 4. Naalakkersuisut nakkutilliisut piginnaatitaaffi suliassaallu pillugit sukumiinerusunik malittarisassaliorsinnaapput.

§ 57. Nakkutilliinermi Oqartussat aalisariutit § 56, imm. 1 naapertorlugu sulinerminnut atatillugu iliuuseqarniarlutik unitsissinnaavaat ikiffigalugillu, matumunnga ilangullugu umiarsuit uppernarsaataat, aalisarnermi allattuiffit, usinik tunisassiorernullu nalunaarsuiffit assigisaallu misissuiffinginiarlugit kiisalu aalisarnermi atortut pisallu misissuiffigisinnaallugit aammalu aalisarnermi atortut suliamut atatillugu misissugassatut isumannaatsumut inisseqqusinnaallugit. Taamatuttaaq angallatit pisanik misissuiffinginissaat, usingiaatinissaat atortutigllu misissuiffignissat siunertalarugit Kalaallit Nunaanni umiarsualivimmut toqqakkamut tulaqquneqgarsinnaapput.

Imm. 2. Pisinnatitaaffit imm. 1-imi taaneqartut eqqartuussivik siumut aalajangiiseqqaarnagu pissusissamisoortumik kinaassutsimut uppernarsaammik takutitsinikkut ingerlanegarsinnaapput.

Imm. 3. Angallatinik nakkutilliissutinik ikkussuineq atornerilu pillugit malittarisassanik Naalakkersuisut aalajangersaasinnaapput, tassunga ilanggulligit angallatip sumiiffianik, sammivianik sukkassusianillu nassiussisartut kiisalu nakkutilliinermi oqartussanut angallatit ingerlataqarneri allat il.il. kiisalu CCTV (assiliissut atorlugu nakkutilliissutit) pillugit malittarisassat.

Imm. 4. Angallatip nakkutilliissutaasa atortuinut piumasagaatitut malittarisaanut taassumalu atorneqarneranut Naalakkersuisut aalajangersaasinjaapput.

§ 58. Nakkutilliinermik oqartussanit aallartitaq, kalaallit, nunallu allamiut angallataanni, kalaallit nunanni akuersissuteqarlutik aalisartunut misissuinissamut nakkutilliinissamullu siunertaqarlutik suliaqarnermi angallatini ilaasogarsinnaaneranik pegqusisinnappaat.

Imm. 2. Nakkutilliinermi Oqartussat aalisariuit Kalaallit Nunaanni tulaassisarnerat, Kalallit Nunaata aalisarnikkut oqartussaaffigisaani usinik nuussisarnerat kiisalu Kalallit Nunaata aalisarnikkut oqartussaaffigisaata avataani kalaallit aalisariutaasa usinik nuussisarnerat nakkutigissayaat

Imm. 3. Imm. 1 naapertorlugu nakkutilliinermut atatillugu angalanermut, najugaqarnermut nerisaqarnermullu aningaasartuutit angallammik piginnittut akilertassavaat. Naalakkersuisut umiarsuaatileqatigiiffit nakkutilliinermi aningaasartuutinik annertunerusumik matussusiisarnissaat pillugu malittarisassiorsinnaapput, tassani aningaasartuutit nakkutilliinerullu siunertaa naapertuuttut nalilerneqarpata.

Imm. 4. Aalisariutini inuttat piumasaqarfingineqarnermikkut nakkutiliisut nakkutiliinerminnut atatillugu oqartussanut suliamut attuumassuteqartunut attaveqarnerannut atatillugu angallatip raduanik, qaraasiakut attavegaaataanik nalunaarasuartaataanillu akiliuteqartinnagit atuisinnaatissavaat.

Imm. 5. Nakkutilliinermi Oqartussat piginnaatitaaffi imm. 1-imi 2-milu taaneqartut siumut eqqartuussiit akuersiseqqaarnagit ingerlanneqarsinnaapput kinaassutsimut uppernarsaammik takutitsinikkut.

Imm. 6. Naalakkersuisut nakkutilliisut imm. 1 aamma 2 malilugit piginnaatitaaffi suliassaallu pillugit malittarisassaliorsinnaapput.

§ 59. Inatsisartut inatsisaat una tassanngaluunniit malittarisassaat naapertorlugit atulersinneqartut naapertorlugit nakkutilliinikkut misissuinissaq siunertaralugu Nakkutilliinerimi Oqartussat piumasarisinnaavaat aalisariut piffissami aalajangersimasumi piffimmik aalajangersimasumiinnissaa. Sapinngisamik piffissaq sumiiffissarlu umiarsuup naalagaanut isumaqatigiissutigineqartassapput.

§ 60. Aalisariutip aalisarnissamut atortulorsorneqarsimasup Kalaallit Nunaata aalisarnikkut oqartussaaffigaani aalisarsinnaatitaaffigingnisaminiikkuni aalisarnermut atortuni aalisariutip iluani toqqorsimatissavai.

§ 61. Nakkutilliinerimi Oqartussat nakkutilliinerup ingerlannissaanut pisariaqarpat uku pillugit nalunaaruteqarsinnaapput:

- 1) tulaassivissanut peqqusineq inerteqquteqarnerlu,
- 2) tulaassinissamut piffissanik peqqusineq inerteqquteqarnerlu,
- 3) nakkutilliinermut oqartussat tulaassinerimi usinillu nuussinermi najuunnissaannut peqqusineq, aamma
- 4) uuttortaanissap siumut nalunaarutigineqarnissaanik peqqussut taamatullu uuttortaanissamut piginnaatitaasumik uuttortaasartumillu uuttortaasoqassaoq.

§ 62. Angallatip naalagaa, suliffeqarfinnik piginnittut sulisullu Inatsisartut inatsisaata taannalu naapertorlugu malittarisassanik aalajangersarneqartumi malinninnerannik nakkutilliinermut atatillugu nakkutilliisunit piumaffigineqarnermikkut paasissutissanik tamanik tunniussissapput, tassunga ilanngullugit aningasaqarnikkut naatsorsuuserinikkullu pissutsit, nakkutilliinerup naammassineqarnissaanut pingaaruteqartut taamatullu nakkutilliinermi misissugassanik tigusinermi naqitanngortitsinerit tunniussinermi aamma elektroniskinngorlugit nalunaarsukkat naqitanngortinneqarnerini nakkutilliinermut oqartussanut akeqanngitsumik ikuutissallutik.

Imm. 2. Aalisarnermik ingerlatsisunik pisaminnik tunisaqartartunik nakkutilliinermut atatillugu nakkutilliinermi oqartussat kukkunersiuismik naalagaaffimmit akuerisaasumik nalunaarsukkamilluunniit atortunik misissorneqarsinnaasunik misissuisussamik toqqaasinnaapput. Misissuineq pisaminik tunisaqartumit akilerneqassaaq.

§ 63. Nakkutilliinikkut Oqartussat, Inatsisartut Inatsisaat una imaluunniit inatsit naapertorlugu aalajangersarneqartut malittarisassat naapertorlugit, pisariaqarfinni qaqugukkulluunniit kinaassutsimik upernarsaammik pissusissamisoortumik takutitsinikkut, eqqartuussivik siumut aalajangiiseqqaarnagu, suliffeqarfuit angallatillu inatsimmik malinninneranik misissuinissaq siunertaralugu isersinnaatitaapput.

§ 64. Aalisakkanik tunisineq il.il. inerteqqutaassaaq:

- 1) aalisarnerup ingerlanneqarnera pillugu malittarisassanut akerliusumik aalisartoqarsimappat,
- 2) pisatut imarisat katitigaaneri pillugit malittarisassanut naapertuutinngippata imaluunniit
- 3) imarisat nalunaarsorsimanngippata, angallatip allattaavianut allanneqarsimanngippata imaluunniit inatsit imaluunniit inatsit naapertorlugu aalajangersarneqartut malittarisassat naapertorlugit nalunaarutigineqarsimanngippata.

Imm. 2. Naalakkersuisut, aalisakkanik tunisisumut il.il., imm.1-mi piumasaqaatinik naammassinninneranut upernarsaatinut malittarisassanik aalajangersaasinnaapput.

Imm. 3. Aalisakkat imm. 1-imi pineqartut sabinngisamik uumatillugit pisariaqarnerisa kinguninngua ingerlaannartumik imaanut avalatsinnejassapput.

§ 65. § 64-mi pineqartumi aalisakkanik tunisisoq § 68 naapertorlugu aalisakkanik tigusinermut atatillugu akisussaajunnaarsinneqarsinnaavoq, qaqinnejartut missiliukannerlugu angissusaat katitigaanerallu taamatullu ateq najugarlu ingerlaannartumik Nakkutilliinikkut Oqartussanut nalunaarutiginerisigut.

Imm. 2. Aalisakkat imm. 1 malillugu nalunaarutigineqartut imatut inissinneqassapput taakkuninnga nakkutilliineq ingerlanneqarsinnaalluni aamma nakkutilliinermi oqartussaniit akuersisoqartinnagu tuniniarneqartussaanatik il.il.

Imm. 3. Aalisakkani qaqinnejartuni imarisat ilai § 64-imi pineqartut naapertorlugin, qaqinnejartut tamarmiullutik inatsimmik unioqqutitsinerussapput, unioqqutitsinerup annertussusaanik immikkoortiterinermi misiliutissanik tigusisoqarneratigut Nakkutilliinermi Oqartussat najuunnerini pisimanngippat.

§ 66. Nakkutilliinermi oqartussat aalisarnerup ingerlanneqarnera pillugu malittarisassanut akerliusumik aalisarnermi pisarineqarsimasut iginneqarnissaannik peqqusisinnapput, imaluunniit imai pisat katitigaaneri pillugit malittarisassanut naapertuitinngippata.

§ 67. Inatsimmi imaluunniit inatsit naapertorlugu malittarisassanik atulersinneqartunik atornera, ilusaa, inissinneri, nalunaaqutserneri aalisarnermilu atortut nalunaaqutserneri pillugit aamma nigartaqqortussusii pillugit malittarisassanik unioqqutitsinermi nakkutilliinermi oqartussat pisariaqartunik iliuuseqassaaq, tassunga ilanngullugu atortut aamma aalajangersaanermi pituttuinermilu atortut peerneqarnissai isumagalugit.

Kapitali 15

Pineqaatissiissutit

§ 68. Inatsimmi immikkut allamik tunngavissaqarluni pineqaatissiissut sakkortunerusoq atorneqartariaqartoq isumaqartoqanngippat, akiliisitaanermik pineqaatissinneqassaaq:

- 1) inatsimmi ukunannga unioqqutitsisoq; § 6, imm. 2, § 8, imm. 1, § 9, § 10, imm. 1-3, § 13, § 14, imm. 2, § 21, § 24, imm. 2, § 32, § 35, § 36, imm. 1, § 37, § 38, imm. 1, § 39, imm. 1, aamma imm. 5, § 40, imm. 1, § 41, imm. 1, § 44, imm. 1, § 45, § 47, imm. 1, § 48, imm. 1, § 50, imm. 1, § 58, imm. 3, § 60, § 64, imm. 1 og imm. 3, aamma § 65, imm. 2,
- 2) § 56, imm. 2, § 57, § 58, imm. 1, § 59, § 61, § 62, imm. 1, aamma § 66, naapertorlugit nalunaaruteqeqqusaanermik malinninngitsoq,
- 3) Inatsisartut inatsisaannik uuminnga tassanngaluunniit malittarisassat aalajangersarneqartut naapertorlugit akuersissummi imaluunniit aalisarsinnaanermut akuersissummi piumasaqaatinik sumiginnaasoq,
- 4) pisortani oqartussanut eqqunngitsunik salloqittaalluniluunniit paasissutissiisoq imaluunniit inatsimmi inatsilluunniit naapertorlugu malittarisassat aalajangersarneqartut naapertorlugit peqqussutigineqartunik paasissutissiinngitsoq, imaluunniit

5) § 56, § 58, imm. 4, § 61, nr. 3, aamma § 63 naapertorlugit nakkutillinermi oqartussanik isertitsinngitsoq akiliisinneqarsinnaavoq.

Imm. 2. Inatsisartut inatsisaat una naapertorlugu malittarisassani aalajangersarneqartuni aalajangersarneqarsinnaavoq aalajangersakkanik unioqqutitsineq akiliisitsinikkut pineqaatissiinermik kinguneqarsinnaasoq.

Imm. 3. Inatsisartut inatsisaat imaluunniit maligassat atuutilersinneqartut Inatsisartut inatsisaat akiliisitsisummik aalajangersaanissamik tunngavissaqartitsippata, akiliisitsissut Kalaallit Nunaanni Pinerluttulerinermi inatsimmi kapitali 5-imi malittarisassat malillugit inatsisitigut pisinnaatitaasoq pisussaatitaasorlu akiliisitsisummut akileeqqullugu peqquneqarsinnaavoq.

Imm. 4. Angallat atorlugu unioqqutitsinerni angallatip piginnittua atuisualuunniit akiliisussanngortinnejqarsinnaavoq, pineqartoq piaarinani mianersugaalliorluniluunniit Inatsisartut inatsisaannik uuminnga tassanngaluunniit malittarisassanik unioqqutitsigaluarpat.

§ 69. Unioqqutitsineq akiliisitsinermit qaffasinnerusumik kinguneqartinneqannginnissaanik nalilerneqarpat, Naalakkersuisut nalunaaruteqqarsinnaapput, inuk pineqartoq unioqqutitsinermi pisuusutut nassuerpat piffissaliunneqartullu ersarinnerusup ingerlanerani, sivitsuinissap qinnutiginerata kingorna, akiligassap nalunaarummi allanneqarsimasup akilernissaanut piumassuseqarluni nassuerpat, suliaq eqqartuussivimmi suliarineqanngitsumik aalajangiiffingineqarsinnaasoq. Taamatuttaaq arsaarinnittoqarnissaanik piumasaqaateqarneq, tassunga ilanngullugu pigisanik nalilinnik arsaarinnissinnaaneq eqqartuussivikkoortitsinngikkaluarluni aalajangiiffingineqarsinnaapput.

§ 70. Suliani allaffissornikkut suliarineqartuni, tak. § 69, Kalaallit Nunaanni eqqartuussisarneq pillugu inatsimmi § 347, imm. 1 aamma § 437, imm. 2, nr. 2 – 3, aamma imm. 3, assigalugit atuutsinneqarput.

Imm. 2. Akiliisitsissut piffissaagallartillugu akilerneqarpat, imaluunniit akuerineqarnerata kingorna akilerneqarpat imaluunniit pineqaatissiineq atorneqarpat malersueqqinnissaq atorunnaassaaq.

§ 71. Kalaallit Nunaanni pinerluttulerineq pillugu inatsimmi arsaarinnittarneq pillugu malittarisassat Inatsisartut inatsisaanni uani aamma atorneqassapput.

Imm. 2. Kisiannili unioqqutitsilluni angallat atorlugu aalisarnermi aalisarnermi atortut atorneqartut, angallatip pisai taakkualuunniit nalingi tamaasa arsaarinnissutaasinnaapput, tassanili pineqaratik pisat unioqqutitsinani ingerlatsinermeersutut uppermarsarneqartut.

Imm. 3. Taamatuttaaq pisat pillugit annertuumik arlaleriarluniluunniit paasissutissiisoqarnerani amigartumilluunniit paasissutissiisoqarnerani angallammik taassumaluunniit nalinganik arsaarinnittoqarsinnaavoq.

Imm. 4. Inatsisartut inatsisaani matumani malittarisassat atuutilersinneqartut naapertorlugit aalajangersakkanik unioqqutitsineq arsaarinnissummik kinguneqarsinnaaneranik aalajangersarneqarsinnaavoq, takukkit imm. 1-3.

Imm. 5. Naalakkersuisut pisap atorneqarnissaa, tassunga ilanngullugu pisap nunami tunitsivimmi suliareqqinnejqarnissaanut tunineqarnissaa pillugit aalajangersinnaapput.

§ 72. Pisat imaluunniit pisat nalingi imaluunniit taakku ilaat arsaarinnissutigineqarpata arsaarinninnermut atatillugu angallat peqquneqarsinnaavoq pisat taakkunatut annertussusillit pisanit

allanit immikkoorteqqullugit aamma nakkutilliisut taakkunannga nalunaaqutsiinissaat akuerissagaa.

Taamaaliornikkut pisat nalingi arsaarinnissutigineqarsimasut pisallu allat akuleruttoornissaat pinngitsoortinnejqarsinnaanngippat angallat peqquneqarsinnaavoq pisat nalingi arsaarinnissutigineqarsimasut tulaateeqqullugit.

Imm. 2. Immikkoortitsineq nalunaaqutsiinerlu angallat Kalaallit Nunaata aalisarnikkut oqartussaaffaniitillugu pisanik useqartillugu ingerlanneqassapput.

§ 73. Isumaqaqnissaq tunngavissaqarpat angallat Inatsisartut inatsisaannik taannaluunniit naapertorlugu malitassatut aalajangersarneqartunik akiliisitsinermik arsaarinninnermilluunniit kinguneqarsinnaasunik unioqqutitsinermi atorneqarsimasoq, angallat nakkutilliinermut oqartussanit tigummigallarnejqarsinnaavoq. Suliani angallatip Kalaallit Nunaanni eqqartuussisarnermi inatsimmi kapitali 37 malillugu tigummigallarneqarnerani taamaaqataanik atorneqassaaq.

Imm. 2. Kisiannili taamaallaat isumaqaqnissaq pissutissaqarpat nunat allamiut angallataat Kalaallit Nunaata aalisarnikkut oqartussaaffiata iluani unioqqutitsisimasoq aammalu angallat aalisarnikkut oqartussaaffiup iluaniitillugu malersorneqarsimappat uniganilu ingerlaannarsimappat Kalaallit Nunaata aalisarnikkut oqartussaaffiata avataani unitsinnejqarsinnaavoq.

Imm. 3. Taamatut akuliuffigineqartoq qinnuteqarpat, politiit piaartumik kingusinnerpaamillu nalunaaquattap akunneri 24-it pingasut qaangiutsinnagit suliaq eqqartuussivimmut saqqummiutissavaat, taassumalu akuliunneq akuerineqarsinnaanersoq aalajangissavaa.

§ 74. Angallat § 73, malillugu tigummigallagaasoq, akiliisitsissummut akiligassat arsaarinnissutigineqartullu nalingi suliassallu suliaineranni aningaasartuutaasut akilernejqarnissaasa tungaanut, imaluunniit akiligassat qularnaveeqqusernissaasa tungaanut aamma § 68 malillugu qanoq iliuisissat naammassineqarnissaasa tungaanut, eqqartuussisoqareerneratigut akiliisitsissutissamilluunniit aalajangiisoqareerneratigut atortui tamaasa ilanngullugit tigummigallagaasinnaavoq. Suliassap inaarutaasumik aalajangiivigineqarnerata kingorna qaammatit marlkut qaangiutsinnagit tamanna pinngippat angallat atortullu naammassiniarnejqarsinnaapput.

Imm. 2. Angallammik atuisimasoq pisinnaatitaanani taassuminnga atuisimappat imm. 1-imik malittarisassat atuutissanngillat.

§ 75. Inatsimmi matumani aalajangersakkanik unioqqutitsinermik eqqartuussivinnut suliassanngortitat Kalaallit Nunaanni Eqqartuussivimmut suliaqartussatut siullertut suliakkiutigineqassapput.

Imm. 2. Akiliisitsinerit Inatsisartut inatsisaat una taannaluunniit naapertorlugu malittarisassat aalajangersarneqartut naapertorlugit aalajangerneqartut Nunatta Karsiata pisassarissavai.

Kapitali 16

Atuutilersitsineq ikaarsaariarnermilu aalajangersakkat

§ 76. Inatsisartut inatsisaat 1. januar 2025 atuutilissaaq, taamaattorli § 24, imm. 2-mi pisanik 30 %-inik tulaassisussaatitaaneq 1. januar 2030 atuutilissalluni.

Imm. 2. Tassunga peqatigitillugu Aalisarneq pillugu Inatsisartut inatsisaat nr. 18, 31. oktober 1996-imeersoq atorunnaarsinnejqarpoq.

Imm. 3. Malittarisassat Inatsisartut inatsisaat nr. 18, 31. oktober 1996-imeersoq kingusinnerusukkut allannguuteqartoq naapertorlugu atuutilersinnejarnikut atorunnaarsinneqarnissamik tungaanut imaluunniit malittarisassanik nutaanik taarserneqarnissamik tungaanut atuutiinnassapput.

§ 77. § 9, imm. 3, nr. 2-mi allassimasoq piginnittuuneq pillugu piumasaqaat inatsisip atulersinneraniit kingusinnerpaamik ukiut qulit kingorna naammassineqarsimassaaq.

Imm. 2. Ingerlatseqatigiiffik, suliffeqarfik imaluunniit inuit ataasiakkaat, inatsisip atuutilernerani annerpaamik pigisarineqartussat qaangerlugit pisassiissutinik pigisallit, tak. § 32. imm. 1, 2 aamma 3, piffissap killeqartup iluani pisassiissutinik pigisanik tunniussinermi, piffissami killilimmi pisassiissutit pigisat aalisakkat amerlassusaat attuumassuteqartoq qaangersimassanngikkaa, § 33-mi oqaatigineqartoq, inatsisip atortuulerneranit piffissami killilimmi pisassiissutinik pigisat nalinga, piffissap killeqartup iluani pisassiissutinik pigisanik annerpaamik pigisaqarneq pillugu malittarisassat eqquutsinnejarnikut ukioq kulakkiissavaat.

Imm. 3. § 10-mi allanneqartoq inuussutissarsiutigalugu aalisarnermut atorneqartunik angallatinik meterinik arfinilinnik angissusilinnik mikinerusunilluunniit nalunaarsuineq inatsisip atuutilerneraniit ukioq ataaseq qaangiutsinnagu naammassineqarsimassaaq.

Kalaallit Nunaanni Namminersorlutik Oqartussat, ulloq 22. maaji 2024

Múte Bourup Egede
Naalakkersuisut Siulittaasuat

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut

